


La'o Hamutuk

Institutu Timór-Leste ba Monitór no Analiza Dezenvolvimentu
Rua Martires dos Pátria, Bebora, Dili, Timór-Leste
Tel: +670 3321040 no +670 7234330
Email: info@laohamutuk.org
Website: www.laohamutuk.org



Dili, 23 Jullu 2012

Bodik ba : Sr/a.....
Iha : Uma Fukun Parlamentu Nasional
Asuntu : Karta aberta ba Distintu Deputadu/a Períodu 2012-2017

Ho respeito,

La'o Hamutuk nudar organizasaun nasionál ne'ebé halo monitór no analiza ba prosesu dezenvolvimentu iha Timór-Leste, hodi fasilita komunikasaun entre povu ho ukun na'in sira katak povu mak sai autór ba iha sira nia prosesu dezenvolvimentu.

Ba dahuluk ami kongratula ba povu Timór-Leste tomak mak partisipa ona iha Eleisaun jerál Parlamentár foin la-lais ne'e ho hakmatek, parabeins mos ba ita-boot sira ne'ebé hetan kadeira iha Parlamentu Nasionál nomos apresia ba CNE, STAE, inklui entidade estadu hotu ne'ebé fó ona kontribuisaun ba prosesu eleisaun.

Tuir definisaun Parlamentu Nasionál iha Konstituisaun RDTL artigu 92 haktuir katak, *Parlamentu Nasionál mak órgaun soberania Repúblika Timor Leste nian ne'ebé representa ema Timor-oan tomak, iha kbiit atu halo lei, fiskaliza no atu halo desizaun polítika ba nasaun.* Relasiona ho mandatu ne'e, La'o Hamutuk enkoraja Distintu Deputadu tomak iha uma fukun Parlamentu Nasionál atu hala'ó didi'ak ita-boot sira nia knaar hodi tane interese nasionál, povu no nasaun ne'e ás liu duke interese partidária ka grupu. La'o Hamutuk prontu atu ajuda no servisu hamutuk, kontribui informasaun hodi haforsa ita-boot sira nia papél atu halo desizaun polítika ruma.

Durante tinan lima kotuk liu ba, lejizlatura anteriór halo no aprova duni lei no polítika barak, maibé infelizmente, lei balun seidauk responde duni moris povo Timor-Leste nian. Nune'e, ami espera lejizlatura foun ne'e la tuir sasidik tuan, maibe atu iha kompeténsia ne'ebé nakonu hodi deside no halo lei ho polítika ne'ebé afavór ba direitu povu kiak no grupu vulneravel sira nian.

Lei ba Rai tolu ne'ebé veto husi eis Presidente Repúblika Dr. José Ramos Horta hanesan ezemplu ida. Nune'e ami sujere ba Parlamentu Nasionál foun atu hakerek foun Lei ba Rai, no tenke tau konsiderasaun ida ne'ebé a'as ba konsultasaun públiku ne'ebe klean ho comunidade, liu-liu feto, grupu vulneravel sira ne'ebe iha area rurais, sociedade sivíl, no tenke mos konsidera preokupasaun eis Prezidente Repúblika nian.

Dezafiu seluk ne'ebé estadu Timor Leste hasoru durante ne'e mak oinsá jere osan husi riku-soin mina rai hodi dezenvolve ekonomia sustentavel hanesan agrikultura, kooperativa, indústria kí'ik, dezenvolve rekursu umanu, no servisu sosiais ne'ebé Timor-Leste presiza atu substitui ekonomia petróleu bainhira mina-rai maran.

Rekursu mina ne'ebe ita iha limitadu, Kampu Bayu Undan no Kitan ne'ebé fornese reseitas ba ita sei maran iha dekadu ida tan, iha tempu ida ne'ebe ita-nia populasaun joventude aumenta dupla kompara ohin loron, no nesidade ekonomiku nian mos aumenta boot. Nune'e, ami sujere atu Parlamentu ho V Governu persisa servisu hamutuk atu prioritiza setór produtivu sira ne'e, bazeia ba planu estadu ne'ebé realistiku no sustentavel, duke halo planu ho fantazia de'it, hodi nune evita malisan rekursu, pobreza, desigualdade sosiál, konfliktu no hamenus seguransa moris.

Aleinde ne'e, Parlamentu Nasionál mos tenke garante duni estadu direitu demokrátiku, bazeia ba Konstituisaun RDTL, Artigu (1.1) katak *Estadu ida ne'ebé demokrátiku, soberanu no respeita ba dignidade ema ida-idak nian*, (2. 2) *Estadu hakru'uk ba lei inan no lei oan sira*, no (6 (b)) *Garante no promove sidadaun sira nia direitu fundamentál, no respeitu estadu nia prinsípiu direitu demokrátiku*.


Konstituisaun RDTL mos opta prinsípiu fundamentál husi Deklarasaun Universál Direitu Umanu - ONU nian. Maibe infelizmente, durante tinan lima kotuk, ita-nia setór justisa sei nafatin fraku, tanba iha intervensaun polítika husi ukun na'in sira no konsekuensia husi impunidade ba krime kontra umanidade durante okupasaun Indonézia ne'ebé sei prevaleze iha Timor-Leste. Ezemplu, Autór krime Maternus Bere ne'ebé Governu anteriór liberta laho'o prosesu legal hatudu katak ita-nia estadu direitu demokratiku sei frajil. Ami fiar katak ita-boot sira sei halo politika ne'ebe diak liu ba nasaun ne'e.

Foin lalais ne'e, ita-nia joven ida mate husi kilat musan lutu povu nian PNTL. Ami hare ida ne'e parte husi aprosimasaun prevensaun konfliktu ne'ebé la valoriza Direitu Umanus. Nune'e ami husu atu iha reformasaun PNTL, liu-liu atu muda sira nia mentalidade militarizmu ba iha Polisia komunitária. Alende ne'e, ami husu atu presiza kria komunikaun polítiku ida ne'ebé maduro no intelektual husi polítiku na'in-sira hodi evita konfliktu no instabilidade sosiál. Timór-Leste hanesan nasaun ne'ebé foin sai husi post-konfliktu, fasil atu monu ba konfliktu bainhira aprosimasaun ukun na'in sira nian la hatuur maturidade polítika ne'ebé loloos.


Ikus liu, ami konsiente katak ita-boot sira sei enfrenta dezafiu barak iha tinan lima oin mai ne'e, ho kna'ar ne'ebé hakerek ona iha Konstituisaun RDTL Artigu 95.1 katak *Parlamentu Nasionál mak halo lei kona ba asuntu báziku sira, polítika interna no esterna nasaun nian*. Nune'e, ami nafatin pronto atu fó kontribuisaun informasaun liu husi ami nia analiza no peskiza atu bele ajuda ita-boot sira hodi determina polítika ne'ebé matenek liu ba povu Timór-Leste tomak. Papél ne'ebé ami halo, hanesan mos parte ida hodi kontribui atu dezenvolve rai doben ne'e ba sustentabilidade no demokrasia.

Mak ne'e de'it ami nia karta aberta ba ita-boot sira, ho konsiderasaun no kolaborasaun tomak ami hato'o obrigadu wa'in.

Sinserdade,



Mariano Ferreira



Alexandra Arnassalon

Ekipa Koordenasaun, La'o Hamutuk